

雷波廳志卷三十六

雜類志

班氏藝文載登小說後世承流百家紛逐或記瑣言或標雜錄鉅細兼賅言之有物細流土壤山海所資一知半解學問所師舉我聞見類而誌之聊備採擇謏陋奚辭志雜類第三十六

漢書地理志犍爲郡有朱提縣山出銀食貨志曰朱提銀重八兩爲一流置一千五百八十它銀一流置千以朱提銀善故也按朱提縣卽今屏山縣朱提山

雷波廳志

卷三十六

雜類

今在雷波地界

蜀典孟侯五月渡瀘處兩岸峻極俯視江流如在井底今雷波四十里有井底鄉乃永善縣地登高下視江流僅存一線井底之說誠然

華陽國志馬湖江之崖色赤白映水中魚從楚來至此而止畏映其水故也

南門外清海水深而闊愛物者嘗買生放之海中游鱗數萬頭潛行鼓浪最得天趣乃鄉愚無知刺船撒網十年前鱗介之儔幾致絕種鄉耆匡陽泗李學成

見傷生甚眾乃稟於官請以此爲放生池立碑垂禁  
永不許漁人再施網罟光緒戊子年其水忽放異彩  
日落時返照成霞且產赤魚游行水面咸以爲異距  
清海二里曰渾海水赤色中產鯉魚大者長二尺許  
道光末年海水漸涸鯉魚銜尾飛去大者在前小者  
在後黎明時人多見之究不測其何往也

東關外四里有小海乃山水瀦蓄而成海邊一洞莫  
測深淺時開時閉開時則水由此落不知其洩流何  
所因名曰落水洞

雷波廳志

卷三十六

雜類

二

雷神洞中有大虵如甕常出飲池水山僧輩皆見之  
故司馬張擴亭詩曰昨有大虵出聯晴露光怪得毋  
神龍子要與風雲會蓋實事也後有人於崖隙塑一  
龍首此後虵不再出未知何故

天姑密四里之梯子崖有觀音寺寺側出一線黑泥  
其細如麵有疾病者虔禱世尊取黑泥回煮湯服之  
其病立愈又崖際瀑布飛懸下有巨蟹大如斗吐納  
雲霧人咸見之

烏拋夷地有銅厰厰徒楊某入深山中見一大樹枝

幹異常樹葉上具有佛像趺坐形狀宛然歸以示人  
識者曰此佛國伽藍樹也楊因再至其地物色之遠  
望有大赤虵蟠其上光焰如騰駭懼而返考通志載  
雍正年間夔州人入白帝山採薪見一大樹每葉上  
具有佛像趺坐形與此相類楊言或不誣也

通志馬湖府產黃連明時一搢紳應巡撫某之求求  
之深山中凡一枝重可二兩者僅得十枝其一枝生  
絕壁間募人懸絙倒垂取之重至三兩今雷波產黃  
連形如雞爪亦最上品惟重二兩者絕少土人云黃

連生深山溪澗中其大者常有虵物守之不可得  
龍湖海馬石長五丈餘相傳昔年龍馬見此石上馬  
邊廳志則云昔人以牝馬繫湖岸龍出與交屢產異  
馬明昇得之貢於都下今考通志載洪武四年明昇  
以全蜀降獻良馬十有一馬色正白蓋得之於羅施  
鬼國養龍坑牝馬與龍交而生者與馬邊志所述殊  
不合至湖中龍馬之說亦實有之同治元年五月五  
日海中有馬游西山白色腹下有鱗精彩照耀居民  
集視逾時仍沒入海此則非羈勒所能加矣

龍湖數里有挖斷山父老傳言道光中有欽天監官某至湖登山四顧因指一處命鄉人持鋤挖斷之並於海阜高處豎一燈杆乃去或私叩之密言曰海波不靖精靈飛越散在人寰恐爲世患故挖斷山脈以洩其氣再燃燈照之則陰霾散矣人異其言莫測所以今此山猶存

黃茅岡山腳產貝母形如雞心有兩葉小於錢長出土外尋其葉掘之則得惟相戒不敢出聲否則風雨驟至有雷霆之應

雷波廳志

卷三十六

雜類

四

羅三溪銅廠灣大樹兩株其根相離丈許至樹枝高處乃相附而生俗呼爲交情樹考通志載宋元符二年九月眉山縣檜木二株異根同榦木枝相附與此樹無殊唯名之曰交情則俚甚矣

嘉慶五年天姑密大飢道殣相望倏來一老嫗指一洞示人曰此中泥可食言訖不見鄉民試之果然羣疑大士化身因名其泥曰觀音粉遠近爭取活人無算考通志載明萬曆三十二年昭劍地方山裂內有石粉如麵民取以爲食單食之則病和麵則飽又存

心錄載正后時正威郡石化爲麵貧者取以爲食皆卽此類也

城東華仙宮祀季漢華陀嘉慶中司馬陸成本製爲藥方懸諸廟壁令有病者掣籤求取頗能愈病又觀音閣有呂仙祠陸公亦製藥籤分男女科各以類求細玩其方用藥不多然皆有精意或謂陸公精岐黃術善養生推其量以濟人志願宏大光緒初年有傳其夫婦仙去者云其事得諸天師云

天姑密鄉民陳希泰得目疾幾喪明後禱於神誓願雷波廳志

卷三十六

雜類

五

敬惜字紙行之數年久而不怠雙目復明人皆以爲遷善之報

通志元初馬湖蠻歲以獨本葱來獻郡縣疲于遞送成宗初罷之

蜀中風俗記馬湖之夷歲暮百十爲羣擊銅鼓歌舞飲酒窮晝夜以爲樂其所儲蓄弗盡弗已謂之諸葛窮夷法

